



Spezi Clique
Jungi Garde
1925

Fasnacht
2026

He nAl, S Hiirni schrumft!

Letschti am e Samschtigmoorge
sitzt dr Männi grad bim Zmoorge,
nimmt e Schlugg us syner Dasse
und dänggt, äs wurdi jetzt no basse,
wenn äär e Bligg in d Zytig wurdi wäärfe
d Tschättere isch in dr Stadt – sii ka grad nit nääreve,
schloot d Baz uff und foot aafoo lääse
uff em Balggoon vo sym Aawääse.
Nach eme Zitli luegt äär ganz verduzt uff
und dänggt, waas muesch denn alles suffe,
äs isch verruggt s git nur no ai Thema
und daas isch nit dr ESC ooder s Glyyma,
s isch ebbis Neys und alli sinn drbyy
di kinschtlig Intelligänz – kuurz KI,
ooder fir die in Ängland dehai
«artificial intelligence» – kuurz AI.

Waas isch denn aber so e KI
isch si guet ooder eher iiii,
längt denn die mentschlich Intelligänz nit
git daas uns e riise Foortschritt,
bruuchts uns denn bim Schaffe nimm
würde d Schwoobe ersetzt, wäär daas nit so schlimm.

Apropos Schwoobe die mien unde duure
hänn nimm so e groossi Schnuure,
finde alles schlächt und wääle d Ampele ab
doch d Wiirtschaft macht bigoscht no schlapp,
si wääle und daas isch kai Scherz
letschte Februar dr Fritze Merz.
Groossi Deen git äär vo sich voor dr Waal
bis jetzt isch es allerdings eher e Quaal,
isch in ere groosse Koalition mit dr SPD
und steerggt drbyy nur d AFD,
druggt sich efter ungschiggt uss
schafft am liebschte alli uss,
e Vegi-Wuurscht muesch anderscht nenne
die hittige Stadtbilder findet äär zum Flänne,
daas dängg ich mir jo amme au
wenn i in Ziri bi mit dr Frau,
willsch mit em Drämmli uff Weil go shoppe
hauts di an dr Gränze fascht us de Sogge,
waartisch e ganzi Stund konsterniert
bis dr Zellner alli im Drämmli het kontrolliert,
me ka nur hoffe fir die Schwoobe
as mer sii glyy wider mee kenne loobe.

Au ääne am groosse Daich goot allewyyl eppis ab
dr Donald macht no lang nit schlapp,
die nadyyrilig Intelligänz duesch amme vermisse
do muesch jo grad e Dail vom wysse Huus abrysse,
im neye Ballsaal seesch se denn danze
dr Donald fliegt grad uff e Ranze,
dr Elon Musk seesch deert diniere
duet äär e Chloorhuen schnabuliere,
si schiesse sich geegesitig aabe
gemäss Waffelobbby muesch daas aber ertraage,
dr Donald pägglet dr Maduro am Schlawittli
und steggt iin z Ney York grad ins Kittli,
vereffentlicht denn doch no d Epstein-Aggte
voor luter schwaarze Bälge seesch aber kaini Naggte,
dänggsch jetzt de bisch im e schlächte Film im Kyyno
bekunnt äär no e Friidenspryys vom Infantino.

Doch au in Basel in dr Verwaltig
und daas isch scho isserscht gwaltig,
bruucht me jetzt KI ooni sich z scheniere
um neyi suuper schlaui Ydee z kreiere.
Wottschesch denn go shoppe in dr Freie
duesch grad iiber so e neys Bänggli gheie,
ooder kunnsch gar niene duure
wäg all dene Thurische uff iirne Duure,
am Märtpatz seesch d Tania Soland
si fuchtlet grad umme mit iirer Hand,
und maint si kenni sich in Basel kai Woonig laische
und ziei doorum halt uff Kaischte.
Laufsch wyter denn zum Steinegraabe
ässe e baar Pudding mit ere Gaable,
und au im scheene Bundesbäärn
het me d Region Basel nimm so gäärn,
s Häärzstigg sigi nur so solala
daas kasch jo au nit zum e Fixpryys ha,
und macht dir daas alles Ranzewee
faare bald scho kaini Drämmli in dr Innestadt mee.

Doch wäärde mir durch d KI alli bleeder
und unseri Hiirni alli spreeder,
ooder wäärde mir alli ganz unscheniert
vo dr KI wägrazionalisiert?
Ganz so schlimm wirds denn au nit
doch d KI isch scho heavy shit,
scho vill Neyerige hänn d Wält veränderet
doch het sich doorum alles gänderet,
villi mache s Lääbe aifacher
und s git immer Gschäftlimacher,
doch ebbis, wo d KI sicher nit ka mache
isch d Magie vo dr Fasnacht z entfache,
in de Stroosse ruesse und pfyffe
daas duet si sicher nit begryffe,
und miesst me iire zeerscht au leere
am e Halt 2 Groossi aabezeleere.

Doorum sinn mir immer no uff dr Gass
und lauffe stolz vom Barfi bis zur Rhygass,
dien d Fasnacht zelebriere
und s Wältgschee kontrastiere,
sinn mit Lyyb und Seel derbyy
fir uns isch glaar «stolz e Spezi z syy».

Fasnacht für alli zum Kenneleere und Usprobiere.
Do findsch alli Informatione: jetzt-fasnacht.ch

Druggerey: Werner Drugg & Medie AG